

Broj:04-01-1160-06/09
Mostar, 24.02.2010.godine

Na osnovu člana 29. i člana 41. Zakona o električnoj energiji („Službene novine Federacije BiH“ broj 41/02, 24/05, 38/05, 61/09), člana 12. stava (1) i člana 14. stava (1) Statuta Regulatorne komisije za električnu energiju u Federaciji Bosne i Hercegovine („Službene novine Federacije BiH“ broj 13/04), člana 31. stava (2) i člana 37. stava (4) Poslovnika o radu Regulatorne komisije za električnu energiju u Federaciji Bosne i Hercegovine („Službene novine Federacije BiH“ broj 59/04), člana 87. i člana 91. stava (2) Pravilnika o javnim raspravama i rješavanju zahtjeva i žalbi Regulatorne komisije za električnu energiju u Federaciji Bosne i Hercegovine („Službene novine Federacije BiH“ broj 37/05), člana 20, člana 22. stava (1) i člana 23. stava (1) Opštih uslova za isporuku električne energije („Službene novine Federacije BiH“ broj 35/88 i 81/08), a postupajući po Žalbi/prigovoru na Rješenja JP „Elektroprivreda HZ HB“ d.d. Mostar, Distribucija električne energije, Distribucijsko područje-Centar Novi Travnik, Poslovnica: Elektro Jajce broj III-2-13-874/09 od 04.09.2009. godine, primljenoj u JP „Elektroprivreda HZ HB“ d.d. Mostar pod brojem III-2-13-01 932 dana 22.09.2009. godine, podnosioca žalbe Jovanke Popratin iz Jajca, Regulatorna komisija za električnu energiju u Federaciji Bosne i Hercegovine-FERK je dana 24.02.2010. godine u nastavku II redovne sjednice donio slijedeće

RJEŠENJE

1. Odbija se žalba/prigovor Jovanke Popratin iz Jajca izjavljena protiv Rješenja JP „Elektroprivreda HZ HB“ d.d. Mostar, Distribucija električne energije, Distribucijsko područje –Centar Novi Travnik, Poslovnica: Elektro Jajce broj III-2-13-874/09 od 04.09.2009. godine, kao neosnovana.
2. Ovo rješenje je konačno i stupa na snagu danom donošenja, te se objavljuje na oglasnoj tabli i web stranici FERK-a, a dispozitiv rješenja u „Službenim novinama Federacije BiH“.

Obrazloženje

U skladu sa članom 41. Zakona o električnoj energiji, proizvođač, odnosno kvalifikovani kupac električne energije kojem je odbijen pristup mreži ili je nezadovoljan uslovima za pristup, može podnijeti žalbu/prigovor FERK-u, što je propisano i članom 83. Pravilnika o javnim raspravama i rješavanju zahtjeva i žalbi FERK-a. Članom 20. Opštih uslova za isporuku električne energije pored ostalog je propisano da uz zahtjev za elektroenergetsku saglasnost treba priložiti broj i datum izdavanja prethodne elektroenergetske saglasnosti, građevinsku dozvolu, projektnu dokumentaciju-dio glavnog ili izvedbenog projekta koji se odnosi na elektroenergetske objekte i instalacije krajnjeg kupca ili proizvođača i dokaz o uplati troškova za obradu zahtjeva, dok je članom 22. stavom (1) ovih Opštih uslova propisano da ukoliko zahtjev za izdavanje prethodne elektroenergetske saglasnosti, zahtjev za izdavanje elektroenergetske saglasnosti i zahtjev za izdavanje saglasnosti za objekte privremenog karaktera i gradilišta ne sadrže podatke iz članova 19, 20. i 21 ovih Opštih uslova, distributer je dužan pisanim putem u roku od osam dana od dana primanja zahtjeva zatražiti od podnosioca zahtjeva dopunu podataka.

Članom 91. stavom (2) Pravilnika o javnim raspravama i rješavanju zahtjeva i žalbi FERK-a propisano je da se na sva pitanja koja se odnose na postupke pred FERK-om, a koja nisu propisana ovim pravilnikom ili posebnim pravilima i propisima FERK-a, primjenjuju na odgovarajući način pravila odnosnih zakona ako to priroda stvari dozvoljava i kada je to u skladu sa nadležnostima i ovlaštenjima FERK-a.

Na osnovu navedenog, podnosilac žalbe Jovanka Popratin iz Jajca je 22.09.2009. godine uputila je FERK-u Žalbu protiv Rješenja broj III-2-13-874/09 od 04.09.2009. godine kojim se njezin zahtjev za izdavanje elektroenergetske saglasnosti odbacuje kao nepotpun putem JP „Elektroprivreda HZ HB“ d.d. Mostar, Distribucija električne energije, Distribucijsko područje –Centar Novi Travnik, Poslovnica: Elektro Jajce (u daljem tekstu: JP „Elektroprivreda HZ HB“ d.d. Mostar), a koju je ista primila pod brojem III-2-13-01 932.

Dana 08.10.2009. godine FERK pod brojem 04-01-1160/09 primio žalbu/prigovor Jovanke Popratin iz Jajca na navedeno rješenje dostavljenu putem JP „Elektroprivreda HZ HB“ d.d. Mostar. U svojoj žalbi/prigovoru Jovanka Popratin je navela da ima žalbu na navedeno rješenje koje je dobila 21.09.2009. godine u poslovnici Elektro Jajce u Jajcu, za svoj stambeni objekat u mjestu Bravnice kod Jajca, te da obzirom da je još povratnik iz izbjeglištva, a nikakvu donaciju nije dobila, spomenuti objekat je djelomično obnovila, te nema sredstava da dobije svu dokumentaciju koju u Elektro-Jajce traže. Navela je i da živi sama od svoje penzije koja iznosi 296,36 KM, što potvrđuje kopijom čeka od penzije, kao i da kada je kuća građena (1983) nije bila potrebna građevinska dokumentacija. Navela je i da se obraćala nadležnoj opštinskoj službi, ali joj nisu izdali uvjerenje da to zemljište tada nije bilo u urbaniziranoj zoni, a pisani zahtjev na protokolu nisu htjeli primiti. Također je u žalbi navela da svi susjedi imaju električnu energiju, a ona ne, te da ni oni nemaju tu dokumentaciju.

JP „Elektroprivreda HZ HB“ d.d. Mostar je uz kopiju žalbe/prigovora dostavila jedino kopiju katastarskog plana, kopiju rješenja na koje je izjavljena žalba/prigovor i kopiju čeka od penzije za 8/2009 na ime Jovanka Popratin.

Obzirom da iz Dopisa uz koji je dostavljena žalba/prigovor nije bilo vidljivo da li je ista prije dostavljanja FERK-u, ispitana u smislu da li je ista dopuštena, pravodobna i izjavljena od ovlaštenog lica, kao i ocjenu opravdanosti iste, kao i obzirom da uz žalbu/prigovor nije dostavljen cjelokupan spis predmeta, FERK je 16.10.2009. godine pod brojem 04-01-1160-01/09 uputio JP „Elektroprivreda HZ HB“ d.d. Mostar dopis u kojem je istog uputio da je u skladu sa članom 91. stavom 2. Pravilnika o javnim raspravama i rješavanju zahtjeva i žalbi FERK-a, potrebno postupiti po predmetnoj žalbi/prigovoru u smislu ispitivanja da li je ista dopuštena, pravodobna i izjavljena od ovlaštenog lica, kao i ocjenu opravdanosti iste u skladu sa pozitivnim zakonskim propisima. Kako je FERK naveo u svom dopisu JP „Elektroprivreda HZ HB“ d.d. Mostar je bila dužna postupiti po istom bez odlaganja, a najkasnije u roku od osam dana od dana prijema FERK-ovog dopisa, te ukoliko žalbu/prigovor ne uvaži, u istom roku su bili dužni žalbu/prigovor s cjelokupnim predmetom dostaviti FERK-u na dalji postupak.

JP „Elektroprivreda HZ HB“ d.d. Mostar po navedenom dopisu nije postupila u roku, te je FERK 18.11.2009. godine pod brojem 04-01-1160-02/09 uputio JP „Elektroprivreda HZ HB“ d.d. Mostar Urgenciju, u kojoj je pored ostalog navedeno da je potrebno da ista bez odlaganja po prijemu ove urgencije, ukoliko je žalbu/prigovor uvažila, o istom obavijesti FERK, odnosno da postupi u skladu sa FERK-ovim dopisom broj 04-01-1160-01/09 od 16.10.2009. godine i žalbu/prigovor ukoliko nije uvažena, s cjelokupnim predmetom dostavi FERK-u na dalji postupak, a sve da bi FERK mogao izvršavati nadležnosti u skladu sa zakonom, te pravilima i propisima FERK-a.

Dana 23.11.2009. godine u FERK je pod brojem 01-01-1160-03/09 primljen Dopis JP „Elektroprivreda HZ HB“ d.d. Mostar, Direkcija društva, Sektor za mjerenje i odnose sa regulatornim „Dostava informacija-Jovanka Popratin“ uz koji je dostavila: Dopis JP „Elektroprivreda HZ HB“ d.d. Mostar Distribucija električne energije, Distribucijsko područje –Centar Novi Travnik, Poslovnica: Elektro Jajce upućen Direkciji društva, Sektoru za mjerenje i odnose sa regulatornim tijelima broj III-2-13-1035/09 od 20.10.2009. godine; Dopis JP „Elektroprivreda HZ HB“ d.d. Mostar upućen Jovanki Popratin broj III-2-13-827/09 od 17.08.2009. godine; Potvrda o primitku pošiljke (primalac Jovanka Popratin) sa datumom 17.08.2009. godine; Službenu zabilješku JP „Elektroprivreda HZ HB“ d.d. Mostar broj III-2-13-865/09 od 31.08.2009. godine; Rješenje JP „Elektroprivreda HZ HB“ d.d. Mostar broj III-2-13-874/09 od 04.09.2009. godine na kojem je naznačen 21.09.2009. godine i potpis Jovanka Popratin; kopiju koverta adresirane na Jovanku Popratin na kojoj je 07.09.2009. godine zabilježeno da ne stanuje na datoj adresi; kopiju dostavnice adresirane na Jovanku Popratin od 04.09.2009. godine; kopiju Žalbe Jovanke Popratin primljenu u JP „Elektroprivreda HZ HB“ d.d. Mostar 22.09.2009. godine; Kopiju katastarskog plana od 12.08.2009. godine (broj posjedovnog lista:485, broj kat.parcele: 8/23/2; kultura: Luka-oranica na ime posjednika Jovanka Popratin) ; Kopiju potvrde o isplati penzije za 08/2009 godine na ime Jovanka Popratin sa naznačenom adresom Kr. Katerine 13/12, 70 000 Jajce; kopija dopisa JP „Elektroprivreda HZ HB“ d.d. Mostar kojim se FERK-u dostavlja žalba Jovanke Popratin na Rješenje broj III-2-13-978/09 od 07.10.2009. godine; kopija dostavnice adresirane na FERK sa otpremnim datumom 07.10.2009; kopija Zahtjeva za elektroenergetsku saglasnost podnosioca Jovanka Popratin primljenu u JP „Elektroprivreda HZ HB“ d.d. Mostar 12.08.2009. godine broj III-2-13-358/09; kopiju lične karte na ime Jovanka Popratin; kopiju Uvjerenja Opštine Jajce, Službe za stambeno-komunalne poslove obnove, raseljenih lica i izbjeglica broj 04-36-6190/09 od 10.08.2009. godine u kojem je navedeno da se Jovanka Popratin vodi kao povratnik u evidenciji ove Službe na adresi Bravnice, broj bb, Jajce, počev od 2009. godine; kopiju Izvadka posjedovnog lista broj 485 posjednika Jovanka Popratin, K.O. Bravnice, broj parcele 8/23/2 broj P.L. 485 naziv parcele Luka, sa navedeno kulturom: oranica; Kopija katastarskog plana od 12.08.2009. godine (broj posjedovnog lista: 485, broj kat.parcele: 8/23/2; kultura: Luka-oranica na ime posjednika Jovanka Popratin); kopiju formulara „Zahtjevi/podaci o stanju dugovanja kupaca električnom energijom“ od 10.08.2009. godine broj 22 koji je popunjen od Distribucija električnom energijom, Organizacijska jedinica Jajce i Snabdijevanje električnom energijom; Službenu zabilješku JP „Elektroprivreda HZ HB“ d.d. Mostar broj III-2-13-972/09 od 22.09.2009. godine.

Obzirom da je u dostavljenoj kopiji Uvjerenja Opštine Jajce, Službe za stambeno-komunalne poslove obnove, raseljenih lica i izbjeglica broj 04-36-6190/09 od 10.08.2009.

godine navedeno da se Jovanka Popratin vodi kao povratnik u evidenciji ove Službe na adresi Bravnice, broj bb, Jajce, počev od 2009. godine i pored činjenice da je predmet žalbe Rješenje kojim se podnosiocu žalbe zahtjev za izdavanje elektroenergetske saglasnosti odbacuje kao nepotpun, u cilju utvrđivanja svih činjenica i okolnosti od značaja, a postupajući u skladu sa načelima efikasnosti i materijalne istine, bilo je potrebno utvrditi da li je podnosilac žalbe povratnik u smislu Memoranduma o razumijevanju i saradnji na elektrifikaciji lokacija/objekata realizovanog povratka i Sporazuma o ponovnom priključenju stambenih objekata povratnika na elektrodistributivnu mrežu. FERK je u cilju upotpunjavanja činjeničnog stanja u postupku, odnosno utvrđivanja svih činjenica i okolnosti koje su značajne za rješenje predmeta, uputio 09.12.2009. godine dopis podnosiocu žalbe broj 04-01-1160-04/09 u kojem je od istog tražio informacije i dokumentaciju vezane za navedeno i uz koji je dostavio dokumentaciju koju je dostavila JP „Elektroprivreda HZ HB“ d.d. Mostar i u kojem je podnosiocu žalbe ostavljen rok od osam dana da se i izjasni o dostavljenoj dokumentaciji, odnosno o svim činjenicama i okolnostima koje su važne za rješenje njegove žalbe. Navedeni dopis podnosilac žalbe je primila tek 16.12.2009. godine, obzirom da je isti pravodobno upućen na adresu Bravnice bb, 70101 Jajce koja adresa je navedena u žalbi/prigovoru. FERK-u se navedeni dopis vratio sa naznakom na poledini koverta „10.12.09. odselila“, te je isti dopis upućen na adresu Kraljice Katarine 13/12, 70 101 Jajce, koja je jedna od adresa koja se pojavljuje u spisu predmetne žalbe/prigovora. Obzirom da podnosilac žalbe u ostavljenom roku od osam dana nije postupio u skladu sa traženim, odnosno nije se izjasnio o dostavljenoj dokumentaciji odnosno o svim činjenicama i okolnostima koje su važne za rješenje predmetne žalbe/prigovora, niti je u FERK dostavio određena obrazloženja, kako je to navedeno u predmetnom dopisu, a sve u cilju upotpunjavanja činjeničnog stanja u postupku koji se vodi pred FERK-om, FERK je dana 07.01.2010. godine pod brojem 04-01-1160-05/09 na adresu Kraljice Katarine 13/12, 70 101 Jajce uputio Urgenciju, u kojoj je pored ostalog navedeno da je potrebno da podnosilac žalbe odmah po prijemu urgencije postupi po dopisu FERK-a broj 04-01-1160-04/09 od 09.12.2009. godine, jer će FERK u protivnom rješavati predmetnu žalbu/prigovor na osnovu dokumentacije sa kojom raspolaže. FERK-u je vraćena koverta sa predmetnim dopisom sa naznakom na poledini koverta „090110 primalac odselio u Srbiju“. Obzirom na navedeno urgencija nije dostavljena podnosiocu žalbe.

U žalbenom postupku, na osnovu spisa predmeta FERK je utvrdio je da je podnosilac žalbe uz Zahtjev za elektroenergetsku saglasnost za krajnjeg kupca od 12.08.2009. godine primljenu u JP „Elektroprivreda HZ HB“ d.d. Mostar pod brojem III-2-13-358/09 dostavila kopiju lične karte, Uvjerenje Opštine Jajce, Službe za stambeno-komunalne poslove obnove, raseljenih lica i izbjeglica broj 04-36-6190/09 od 10.08.2009. godine navedeno da se Jovanka Popratin vodi kao povratnik u evidenciji ove Službe na adresi Bravnice, broj bb, Jajce, počev od 2009. godine, kopiju Izvadka posjedovnog lista broj 485 posjednika Jovanka Popratin, K.O. Bravnice, broj parcele 8/23/2 broj P.L. 485 naziv parcele Luka, sa navedeno kulturom: oranica; Kopija katastarskog plana od 12.08.2009. godine (broj posjedovnog lista: 485, broj kat.parcele: 8/23/2; kultura: Luka-oranica na ime posjednika Jovanka Popratin); kopiju formulara „Zahtjevi/podaci o stanju dugovanja kupaca električnom energijom“ od 10.08.2009. godine broj 22 koji je popunjen od Distribucija električnom energijom, Organizacijska jedinica Jajce i Snabdijevanje električnom energijom; Službenu zabilješku JP „Elektroprivreda HZ HB“ d.d. Mostar broj III-2-13-

972/09 od 22.09.2009. godine. FERK je dalje utvrdio da je JP „Elektroprivreda HZ HB“ d.d. Mostar, podnosiocu žalbe uputila Zahtjev za dopunu dostavljene dokumentacije dana 17.08.2009. godine pod brojem III-2-13-827/09 kojim je od podnosioca žalbe traženo da dostavi prethodnu elektroenergetsku saglasnost, ovjerenu kopiju građevinske dozvole stambenog objekta i projektnu dokumentaciju (projekat elektroinstalacija, jednopolna šema ili sl.) i tako postupila u skladu sa članom 22. stav (1) Opštih uslova za isporuku električne energije, kao i da je 31.08.2009. godine pod brojem III-2-13-865/09 sačinjena službena zabilješka od strane Rukovodioca Poslovnice Elektro Jajce da podnosilac žalbe nije dostavio traženu dokumentaciju. FERK je utvrdio i da se u evidenciji Službe stambeno-komunalnih poslova obnove, raseljenih lica i izbjeglica Opštine Jajce vodi kao povratnik na adresi Bravnice bb Jajce počev od 2009. godine, ali da je podnosilac žalbe, u evidenciji JP „Elektroprivreda HZ HB“ d.d. Mostar, evidentirana kao prijeratni i poslijeratni kupac-potrošač električne energije na adresi u Ulici Kulina bana 13/12, Jajce, te da je iz dostavljene dokumentacije vidljivo da objekat podnosioca žalbe na adresi Bravnice bb prema istoj evidenciji ni prije, ni poslije rata nije bio priključen na elektrodistributivnu mreže. Iz dostavljene dokumentacije je vidljivo i da podnosiocu žalbe obavještenje o penziji stiže na adresu Kr. Katarine 13/12, 70 000 Jajce, ali FERK i pored uložених napora nije mogao utvrditi adresu prebivališta podnosioca žalbe.

I pored proceduralnog propusta JP „Elektroprivreda HZ HB“ d.d. Mostar, koja je, obzirom da se radi o zahtjevu koji je nepotpun, trebala donijeti zaključak, a ne rješenje, a sve u skladu sa pozitivnim zakonskim i podzakonskim propisima, prema iznesenom činjeničnom i pravnom stanju, kao i činjenici da se kod dostave žalbe FERK-u JP „Elektroprivreda HZ HB“ d.d. Mostar pozvala na članove 83. i 84. Opštih uslova za isporuku električne energije, u kojima FERK ne rješava po žalbi kao drugostepeni organ, u žalbenom postupku utvrđeno je da je JP „Elektroprivreda HZ HB“ d.d. Mostar pravilno provela postupak i da je o zahtjevu podnosioca žalbe odlučila u skladu sa odredbama članova 20, 22. stav (1) i (5) Opštih uslova za isporuku električne energije, te je na osnovu člana 87. stav (2) Pravilnika o javnim raspravama i rješavanju zahtjeva i žalbi FERK-a, odlučeno kao u dispozitivu ovog rješenja.

POUKA O PRAVNOM LIJEKU:

Protiv ovog rješenja podnosilac žalbe može tužbom pokrenuti upravni spor tužbom kod Kantonalnog/Županijskog suda u Mostaru u roku od 30 dana od dana prijema rješenja. Tužba se predaje sudu direktno ili mu se šalje poštom preporučeno. Tužba se može izjaviti i na zapisnik kod navedenog suda ili bilo kojeg drugog suda.

PREDSJEDNIK FERK-a
Zdenko Šimunović s.r.